

Ση Σαλονίκη, Στάμον Σταυρίτα 1995.

Πασά Γερλίκια, απόθεν να σκαλώνω και πού να τελένω... .

Εκλώστα ασόν Πόντον, όθεν επήγαμε εκόν σεράντα νοματοί ντ'εδέβαμε τη
μήναν, εσεβασ'οσπίτ'κι αλλομίαν, ντό τερείς, έναν γράμμαν ασόν Γε. Γρ. Γρη-
γοριόδην ασήν Αθήναν:...

Απέσ'σο γράμμα σ' εγόπ'ς λόγια, πατριωτικά λόγια, χαιρετίας και παρόπον
πα, ίλια ίλιαμ για το ποντιακόν την εκπομπήν, ντο εποίνα κι εσύ εφουκρούσ
και εκτύπανεν η καρδιά σ' και επέτανεν ο νους ισ'...

Ντο να λέγω σε, πασά Γερλίκια, αγνά ωβά κι αγνά κοσάρας: Αδά σην Ελλάδαν
τ'αγνά και τα θαμαστά πολλά είν'. Το Κρατικόν η Ραδιοφωνία ζαρωτά ζαρωτά
τερεί εμάς, που η ρίζα μουν κρατεί σον Πόντον και τον Καύκασον. Αφορισμέν
οι Έλληνοι αδά, πάντα τ'ατοινέτερα ιστορίας σύρνε έμπρ'. Τ'ατοινέτερα τα
έργατα, τ'ατοινέτερα τα μερεφέτια, όλια τ'ατοινέτερα γιασεύνε. Ο ηχόν τη
λύρας σην καρδίαν στουν ζάι 'κί κρούει, φαίνεται και τοι προσφυγίων η ιο
ρία πέραν ση Μαύρη-θάλασσαν ασά παλαιά τα χρόνια και τα υστερνά πουθέν
τόπον 'κ'έχ'. Καταραμένον Ελλάδα, πάντα οι ζέν'εγροικούνε και δίνε τιμήν
σ' όλια τα πράματα. Σα ζένα κράτη για τ' Έλληνους ασόν Πόντον και τον Καύ
σον λόγια χρυσά έναν σερίν κι απέσ'σην Ελλάδαν... ντο να λέγω...

Εσύ χάρεσαι με τ'εμέν, με τ'εμά τα γράμματα ντο έστειλα σε και εντώκες
ατα σο νου μ'. Εγώ πα χαίρουμαι με τ'εσέν, με τ'εσά τα γράμματα. Καμμίαν
'κ'ανασπάλω, πως επήες σο Γαρς, ετολανεύκουσε σο χωρίον τη κυρού σ'κ'ερά
ευες τον τόπον, όθεν εκοιλοπόνεσεν η μάνα σ' και έγχε σε σον πόσον. Πουλ
πον με τσακωμένα τα φτερά επέτανες κ'εγυροιλώσκουσε σ'εγνώριμια τόπια.
Έπες ασό νερόν τη Πατρίδας, εμυρίστες το χώμαν τη Γαρσί, εκιοζιάτευες όλ
τ'εκές, ενεστάναζες και έλεγες: " Ε... μαύρ'ανθρώπ'.. Έκιτι χρόνια:..."

Πολλά θέλω ν'ανταμούμες μίαν. Εσύ θα έρχεσαι... εγώ θα έρχουμαι... 'κί
ζέρω. Η ζωή έχ' και θάνατον... ας εφτόμε στο την αντάμωσην.

Πολλά χαιρετίας σην οικογένεια σ'. Αναμένω σε.

Με πολλά εγόπ' και τιμήν

Στάθης Ι. Βυσταθιάδης, Συγγρού 39, τηλ. 52477

546 30 Θεσσαλονίκη